

**Монголын Олборлох үйлдвэрлэлийн ил тод байдлын санаачилгын
Ажлын хэсгийн хуралдааны тэмдэглэл /2014-03-12/**

Ажлын хэсгийн 35 дугаар хуралдаан 2014 оны 03 дугаар сарын 11-ны өдрийн 10 цагт Уул уурхайн үндэсний ассоциацийн хурлын танхимд зохиогдов.

Ажлын хэсгийн хуралдаанд Засгийн газрын ахлах референт Э.Сумъяа, Ашигт малтмалын газрын тасгийн дарга н.Бямбадагва, Татварын ерөнхий газрын татварын байцаагч Д.Энхтуяа, Мэргэжлийн хяналтын газрын дэд дарга н.Гүньязар, Монголын Уул уурхайн үндэсний ассоциацийн гүйцэтгэх захирал Н.Алгаа, Хил хязгааргүй алхам ТББ-ийн тэргүүн Н.Баярсайханыг орлож туслах ажилтан Ч.Уранчимэг, МБОИЗ-ийн (Монголын байгаль орчины иргэний зөвлөл) удирдах зөвлөлийн гишүүн Б.Батболд, МБОИЗ-ийн гишүүн Ж.Гомбожав, Ил тод сан ТББ-ын тэргүүн Д.Цэрэнжав, Миний Монголын газар шороо хөдөлгөөний тэргүүн Б.Отгонсайхан, Ариун суврага хөдөлгөөний тэргүүн Г.Чагнаадорж, Хариуцлагатай уул уурхай ТББ-ын тэргүүн Л.Долгормаа, Оюутолгой ХХК-ны ахлах мэргэжилтэн Х.Лхамаа, мэргэжилтэн О.Адъяа, Алт үйлдвэрлэгчдийн холбооны ажлын албаны дарга С.Бүрэнтоогох, Эрдэнэс таван толгой ХК-ны мэргэжилтэн И.Батмөнх, Си Жи Би И Эм ХХК-ны Засгийн газартай харилцах албаны менежер Ч.Бямбасүрэн, Арева монгол ХХК-ны хуулийн асуудал хариуцсан захирал Б.Оюунчимэг, Саусгоби сэндс ХХК-ны Засгийн газар, олон нийтийн харилцах хэлтсийн дарга Б.Алтанбагана, Петро матад ХХК-ны мэргэжилтэн н.Одбаатар, Ажлын хэсгийн нарийн бичгийн дарга, ажлын албаны зохицуулагч Ш.Цолмон нар оролцов. Хуралд ажлын хэсгийн 33 гишүүнээс 20 гишүүн оролцож ирц 60,6 хувьтай байв.

Мөн хуралдаанд Интерконсалтинг компанийн судалгааны багийнхан болон ажлын албаны харилцааны мэргэжилтэн Б.Дэлгэрмаа, санхүүгийн ажилтан А.Отгонтунгалаг, Мэдээлэлийн технологийн зөвлөх Г.Ганбат нар оролцов.

Хурлыг Уул уурхайн ассоциацийн гүйцэтгэх захирал Н.Алгаа удирдан явуулав.

Н.Алгаа: Өнөөдрийн хуралд ирвэл зохих 33 гишүүнээс 18 хүн ирсэн мөн хэдэн хүн ирж яваа учраас хурлаа эхлүүлье. Ажлын хэсгийн зарим гишүүд солигдсон учир өөрсдийгөө товч танилцуулна уу.

Дараа нь хурал даргалагч хурлын хөтөлбөр, дотоод журмыг уншиж танилцуулав.

I. ХЭЛЭЛЦСЭН нь: Монгол улсын “ОҮИТБС-ын холбоо харилцааны баримт бичиг 2014-2016 он” танилцуулга

Н.Энхжаргал (Интерконсалтинг ХХК-ийн захирал): Бид үүнээс өмнө 2 удаагийн танилцуулга хийсэн. Бид хийсэн судалгаан дээрээ үндэслээд “коммуникацийн стратеги төлөвлөгөө” боловсруулж 2 ч удаа танилцуулсан. Манай зөвлөх Сэлэнгэ танилцуулгыг маш товчон хийнэ.

Ш.Сэлэнгэ: Бид 11 сараас 2 сарыг дуустал 3 сар ажилласан. Энэ коммуникацийн ажлын төлөвлөгөөг гурван том судалгаа болон ажлын алба, ажлын хэсэг болон бусад вэбсайтуудаас авсан хоёрдогч мэдээллүүдийг ашиглаад

нийтдээ дөрвөн үндсэн баримт бичиг дээр тулгуурлаж боловсруулсан. Ингээд төлөвлөгөөгээ товч танилцуулъя. /Танилцуулгыг хавсаргав/

Н.Алгаа: Энэ стратегийн төлөвлөгөө, 2014 оны төлөвлөгөө бүгд явж байна. Одоо ойлгохгүй, тодруулах юм байвал асууж болно. Бид шийдвэр гаргах ёстой юм байна.

Л.Долгормаа: Энэ чинь 2014 оны төлөвлөгөө биш биздээ?

Н.Алгаа: Стратеги төлөвлөгөө дотор чинь бүх юм байгаа. Түрүүнд танилцуулсан.

Ш.Сэлэнгэ: Тараасан материал дотор байгаа. Харин цагтаа багтах гээд дутуу танилцуулсан байж магадгүй. Гадагшаа болон дотогшоо чиглэсэн ажлуудыг хийхээр тусгасан байгаа. Тухайлбал, бусийн семинар, албан бичгийн харилцаа гэх мэт ажлууд байна.

Л.Долгормаа: Ойлголоо.

Э.Сумъяа: Сэлэнгээгээс асуух асуулт байна: Энэ ажлыг ямар эх үүсвэрээр санхүүжинэ гэж хийсэн бэ?

Ш.Сэлэнгэ: Бид судалгаа хийж явахдаа доноруудтай уулзсан. Ингэхэд Дэлхийн банк 150 000 долларын ажил төлөвлөөд хийгээгүй байгаа гэж ярьсан. Бид үүнд үндэслээд төлөвлөгөөгээ хийсэн байгаа. Нөөц байгаа гэж ойлгосон.

Э.Сумъяа: Энэ ажлууд төлөвлөгөөнд байгаа юу? Энэ талаар Цолмонгоос асууя.

Ш.Цолмон: 2014 оны ажлын төлөвлөгөөнд дээрх ажлууд орсон байгаа. Гэхдээ бид санхүүгийн хувьд хэлж мэдэхгүй байна. Одоо энэ хэрэгжиж байгаа төсөл маань 5 сарын 31-нээр дуусаж байгаа. Дөрөв дэх удаагийн 400,000 долларын санхүүжилтийн хүсэлтийг Эдийн засаг хөгжлийн яаманд явуулсан бөгөөд нийт зардлын ихэнх хувийг холбоо харилцааны ажилд зарцуулахаар төлөвлөсөн. Журмын дагуу ЭЗХөгжлийн яамнаас Дэлхийн банк руу хүсэлт явах бөгөөд үүнийг гурван сарын дотор шийдвэрлэж өгөх боломжтой гэсэн байр суурьтай байгаа. Тэгэхээр санхүүжилтээс хамаараад зарим ажлууд хойшлогдож магадгүй байх. Бид наана нь аль болох боломжоороо зарим нэг ажлуудыг хийж амжуулах бодлтой байгаа. Тухайлбал, телевизийн нэвтрүүлэг, орон нутагт самбар байрлуулах гэх мэт.

Ж.Гомбожав: Төрийн ордонд болсон хурал дээр ТАН эвсэлд МБОИЗ ордоггүй гэж ярьж байсан. Энэ нь тусдаа 700 гаруй ТББ-уудыг нэгтгэсэн шүхэр байгууллага юм. Иймд төлөвлөгөөнд яагаад орж болдоггүй юм гэж ярилцаад оруулахаар болсон. Гэтэл энэ төлөвлөгөөнд бас л ТАН эвсэл гээд бичсэн байна. Яагаад МБОИЗ-ийг хаячихаад байна вэ? Бид бол хуралдаа суугаад, дуу хоолойгоо өргөөд байгаа. Мөн МБОИЗ-ийн тэргүүн Дамдинсүрэн гэж хүн болсон байгаа. Үүнийг ажлын хэсгийн хүмүүс ойлгооч ээ гэж хүсэж байна.

Э. Сумъяа: 2007 онд гурван талын оролцоо санамж бичигт гарын үсэг зурсан. Үүнд иргэний нийгмийг төлөөлж ТАН эвсэл гарын үсэг зурсан, 2012 онд Засгийн газрын 222 дугаар тогтоол гарсан, үүнд мөн ТАН эвсэлд МБОИЗ багтаж ажлын хэсэгт байхаар тоог оруулсан байгаа. Дараагийн хариулт бол, ажлын

хэсэгт оруулах гишүүний нэрийг танай байгууллага өөрөө томилоод ирүүлэх ёстай.

Э.Гомбожав: Та буруу ойлгоод байна. Бид 2 хүнээ томилоод хуралдаа оролцоод явж байгаа.

Б.Батболд: Энэ төлөвлөгөөн дээр дунд хугацааны стратеги дээрх асуудлууд нь ерөнхий санагдаад байна. Бид өөрсдөө хянаачихъя гэхээр үзүүлэлтүүд нь сонин болоод байна. Тэгэхээр бид энэ тал дээр та нараас дахин тусlamж авах хэрэг гарах гээд байна. Анхнаасаа ингэж хийсэн үү?

Ш.Сэлэнгэ: Тийм ээ, тусlamж авах юм гарна.

Б.Батболд: Бид өөрсдөө л шууд үнэлчихмээр байх юм.

Ш.Сэлэнгэ: Энэ маш чухал асуулт байна. Бид 3 сар судалгаа хийсэн байгаа. Үүн дээрээ үндэслээд төлөвлөгөөг хийсэн. Бидний ажигласнаар энэ ажлыг гадаад судалгааны байгууллага хийсэн нь илүү оновчтой зөв болно. Иймээс гадны байгууллагаар хийлгэхээр төсвөө хийсэн байгаа.

Б.Батболд: Миний бодлоор ажлын хэсгийн гишүүд өөрсдөө дүгнэж болохгүй ю? Бидэнд олон төрлийн мэргэжилтэй, туршлагатай хүмүүс байгаа учраас боломж байгаа гэж бодож байна.

Ш.Сэлэнгэ: Бид захиалга авах байдлаар хийгээгүй. Коммуникацийн мэргэжилтэн ихэнх ажлаа өөрөө хийчих боломжтой. Зөвхөн эхний стратеги дээр өөрсдийг үнэлэх гэж байж гадны байгууллага авах нь зүйтэй, бусад ажлуудыг өөрсдөө хийгээд явах ёстай.

Н.Энхжаргал: Танигdsан байдлын судалгаа гэдэг дээр нөхцөл байдлын судалгаа яаж хийдэг вэ гэхээр одоо байдал ямар байна вэ? гээд 100 хүнээс асуугаад хэдэн хүн мэдэж байна гэдгээр нь дүгнэнэ. Өөрөөр хэлбэл 15 хүн мэдэж байвал 15 хувь нь мэдэж байна гэх жишээний. Үр дүн бол тоон үзүүлэлтээр илрэх ёстай. Өнөөгийн байдлын хэмжүүр нь байхгүй учир ирээдүйд ямар байхыг хэмжих боломжгүй юм. Бид стратегийг гаргаж ирж байгаа бөгөөд заавал манай байгууллагыг гэрээлээд явахыг хүсээгүй. Энэ олон ажлуудыг угаасаа нэг жилд хийж амжихгүй.

С.Бүрэнтогтох: Өнөөдөр стратегийн талаар ярьж байна. Үүнд тухайлбал, алтны салбарын стратеги гэж томъёолж болох уу.

Ш.Сэлэнгэ: Бидний төлөвлөгөө бол “ОУИТБС-ын стратеги төлөвлөгөө” гэж байгаа.

Н.Алгаа: Бидний асуудал бол ОУИТБС-ын тэр дундаа коммуникацийн стратегийн талаар ярьж байна. Салбарын стратеги гээд ярвал өнөөдөр дуусахгүй юм болно. Одоо ингээд асуултаа таслах саналтай байна, учлаарай.

Б.Алтанбагана: Би төсвийг тооцоолж үзэхэд арай багадахгүй юу? Нэг сард 11 мянга орчим гарч байна.

Ш.Сэлэнгэ: Бид нар 2014 оны төсвийг 150 сая төгрөг орчимоор тооцоолсон.

Б.Алтанбагана: Надад хэдэн санал байна. Би энэ чиглэл дээр жаахан ажиллаж байсан болохоор гаднын байгууллагаар судалгаа хийлгэхэд энэ мөнгө чинь хүрэхгүй байх шүү, нэмвэл яасан юм гэж бодож байна.

Ш.Сэлэнгэ: Судалгааны зардлыг хамгийн багаар тавьсан байгаа, багадаж магадгүй.

Б.Алтанбагана: Одоо яг энэ чиглэлээр ажиллаж байгаа ажилтан байна уу. Энэ ажлыг ганц хүн дийлэхгүй. Тиймээс туслах гэрээлэх байгууллагын талаар тусгаж, ажиллуулсан нь зүгээр санагддаг. Хүмүүст өгөх мессежээ зөв сонгож тогтмол явуулах хэрэгтэй байх, түүнчлэн олны танил хүмүүсийг сурчилгаандаа оруулах нь зүгээр гэсэн саналтай байна.

Н.Алгаа: Бид санхүүжилт нь найдваргүй юман дээр ярьж байгаа учраас заавал бүр нарийвчлаад байх шаардлагагүй юм. Яагаад гэвэл үүнийг жилийн төлөвлөгөө гэж үзэх боломжгүй. Үүнийг улам нарийн болгоод байвал бид юу ч хожихгүй. Өөр санал байвал хэлж болно. Харин энэ төлөвлөгөөг хурдан хэрэгжүүлэхийн тулд төрийн сайд, дарга нар маань доноруудтай ярилцаж санхүүжилтийг хурдан шийдүүлэх нь чухал юм.

Э. Сумъяа: Энэ төлөвлөгөөг бид хүлээгээд авчихъя. Гэхдээ энд бидэнд цааш нь боловсруулах, бид нар ажиллахаар олон асуудал бий. Сэлэнгэ зөвлөхөд баярлалаа гэж хэлье. Үүнийг манай хүмүүс санхүүжилтэндээ үндэслээд, нарийвчлаад дараагийн ажлын хэсгийн хурлаар оруулж ярилцаа. Бид эхлээд доноруудтай уулзаад, ямар санхүүжилт авч болох талаар тодорхой болгож тохироод төлөвлөгөөгөө хийх саналтай байна. Мөн улсын төсвөөс авдаг санхүүжилтээс хэдэн төгрөг буцаад байгаа. Үүнийг холбоо харилцааны ажил руу зарцуулах талаар 2015 оны улсын төсөвт тусгах ажлыг холбогдох хүмүүстэй ярилцаж бэлтгэх хэрэгтэй байна. Мөн улсын төсвийн санхүүжилтээ жаахан нэмэгдүүлэх хэрэгтэй байна. Уг нь бидэнд дотоод нөөц байгаа, үүнийг ашиглах хэрэгтэй байна.

С.Бүрэнтогтох: Алтны салбарт Засгийн газар санаа тавьж байгаа учраас мөнгө байна, хувийн хэвшлийнхэнд ч гэсэн мөнгө байна гэж хэлмээр байна.

Э.Сумъяа: Гэхдээ тэр мөнгөөрөө та нар л юм хийнэ. Түүнээс бид хандив авах ёсгүй.

Ш.Сэлэнгэ: Бид хэдийгээр бичиг цаас өгсөн ч гэсэн гүйцэтгэлийн үр дүнг үзмээр байна, ядаж эхлүүлчихмээр байна. Бидэнд хэвлэл мэдээллийн салбарт зарим нэг холбоо, сүлжээ, танил тал байна. Санхүүжилт хүлээлгүйгээр дараа нь төлбөрийг нь хийхээр гэрээ байгуулаад хэвлэл, мэдээллийн зарим нэг ажлуудыг хийхэд туслах боломж байна гэдгийг бид хэлсэн байгаа.

Л.Долгормаа: Төлөвлөгөөний гарчиг дээр нэг санал хэлмээр байна. “Коммуникацийн төлөвлөгөөний стратеги, чиглэл” гэмээр байна.

Н.Алгаа: Одоо болъё. Уг үсгийн алдаа засаад яах вэ?

Ш.Сэлэнгэ: Гарчиг бол энүүгээрээ байх ёстой. Бид бүх юмаа хийж дууссаны дараа хамгийн их туршлагатай Гана улсын 2009 оны Коммуникацийн төлөвлөгөөтэй харьцуулж харсан.

Н.Алгаа: Мэргэжлийн хүмүүстэй маргахад хэцүү. Одоо стратеги төлөвлөгөөгөө хүлээн авъя. Нэгдүгээр асуудал дууслаа.

ШИЙДВЭРЛЭСЭН нь:1. Энэ стратеги төлөвлөгөөг дэмжин хүлээн авч хэрэгжүүлэхийн төлөө талууд хамтарч ажиллахаар тогтов.

II. ХЭЛЭЛЦСЭН нь: Засгийн газар, Компаниудын 2013 оны тайлагналын явц

н.Бямбадагва: 2013 оны тайлангийн явц 40 гаруй хувьтай явж байна. 2013 оны 12 дугаар сарын 31-ний байдлаар кадарstryн бүртгэлд бүртгэгдсэн 1660 тусгай зөвшөөрөл эзэмшиж байгаа компани байна. Үүнд цацраг идэвхит бодис газрын тосны компаниудын тоо ороогүй. Ашиглалтын 1300, хайгуулын 1729 нийт 3029 тусгай зөвшөөрөл буюу 1629 эзэмшигч компани байна. Тайлан гаргалтын явцыг Зууны мэдээ, Үндэсний шуудан сонингуудад зарласан байгаа. Мөн АМГ-ын болон ажлын албаны цахим хуудсаар нийтлэсэн байна. Өнөөдрийн байдлаар 470 компани тайлангаа ирүүлсэн байна. Үлдсэн компаниуд руу 2014 оны нэгдүгээр улиралд багтаан тайлангаа ирүүлэх тухай мэдэгдэл хүргүүлэхээр ажлын албатай хамтран ажиллаж байна. Хугацаандаа тайлан ирүүлээгүй компанийн нэрсийг МХЕГ-т хүргүүлнэ. Мөн тайлан гаргадаг аж ахуйн нэгжүүдийн нягтлан бодогч нарт сургалт явуулахаар бэлтгэл ажил хийгдэж байна. Ерөнхийдөө ашиглалтын тусгай зөвшөөрөл эзэмшдэг компаниуд тайлангаа гаргаж сурсан, хайгуулын тусгай зөвшөөрөл эзэмшигч нар жаахан хойрго хандаж байна. Асуулт байвал асууж болно.

Э.Сумъяа: Аудитаар баталгаажсан тайлан ирж байна уу?

Н.Бямбадагва: Жилийн эцсийн тайлангийн хугацаа 2 сарын 15-наар дууссан тул одоо бараг аудитлагдсан тайлан ирж байгаа байх. Одоо ирсэн 400 гаруйд тайланд асуудал гайгүй байх, бид сайн шалгаж авч байгаа.

Х.Лхамаа: Өнгөрсөн үетэй харьцуулахад тайлангийн явц ямар байна.

Н.Бямбадагва: Бараг адилхан байгаа байх, хугацаа дөхөөд ирэхээр л шавчихдаг.

Н.Алгаа: Одоо өөр асуулт байхгүй бол ТЕГ-аас төрийн байгууллагуудын тайлангийн явцын талаар мэдээлэл хийнэ.

Б.Дэлгэрмаа: Тайлан гаргах тухай мэдэгдэл хүргүүлнэ гэсэн үүнийг танайх явуулах хэвээрээ юу, хамтарсан логотой явах уу ?

Н.Бямбадагва: Энэ асуудлаа манай ажлын хэсэг дээр яриад байгаа. Ер нь бол манайх ил тодын тайлан авах нь буруу байгаа юм. Уг нь ажлын албандаа л авмаар байна. Төрийн байгууллагаар дамжуулж авмааргүй байгаа юм. Манайх оролцдог бол туйлын буруу юм.Ажлын албан дээр чадамж байхгүй болохоор бид аваад байгаа юм.

Э.Сумъяа: Ашигт малтмалын хуулийн 48-ын 10-аар бол танайх авах болоод байгаа юм.

Н.Бямбадагва: Агууламжаараа бид уулын ажлын тайланг авч нэгтгээд мөн ил тод тайланг авч байна, үндсэндээ 2 тайлан нэгтгэж өгч байгаа.

Н.Алгаа: Хуулиар үг үсэг нь өөр, албаны тайлангийн маягт бас өөр учраас нэг тайлан биш болоод байна. Өөрөөр хэлбэл төрийнх нь төрдөө, компани тайлан төрөөр дамжихгүй шууд ажлын албандаа авдаг болмоор байна гэсэн санаа юм байна.

Ш.Цолмон: Одоохондоо Сангийн сайд, Статистикийн хорооны даргын батласан журам тийм л байгаа. Тэрнийгээ л мөрдөөд явж байгаа. Ажлын албанд тайлан хүлээн авах боломж, чадавхи одоогоор байхгүй байна.

Б.Дэлгэрмаа: Энэ асуудлыг ярьж байгаа шалтгаан нь, бид өнгөрсөн 6 жил хамгийн ихдээ 300 компанийн тайлан гаргуулж байсан. Харин өнгөрсөн жил АМГазар бүх компаниудад бичиг явуулснаар 1500 гаруй компанийн тайланг авсан. Тэгэхээр 1800 компаниас 1500 нь ил тодын тайлан гаргасан гэдэг мэдээллийг өгч байсан бол энэ жил багасах вий гэсэн үүднээс албан бичгийг танайхаар явуулах боломж байна уу гэсэн юм.

Н.Бямбадагва: Бид өнгөрсөн жил маш том ач холбогдол өгсөн. Тайлангаа гаргаагүй тохиолдолд 500 мянгаас 1 сая төгрөг хүртэл торгох, цаашилбал тусгай зөвшөөрлийг хураах гэх мэт арга хэмжээ авна гэж шаардсан. Гэхдээ цаашдаа энэ маягтаар манайх тайлан авах нь буруу юм, бид буруудах ч талтай.

Н.Алгаа: Тэгэхээр одоогоор үүнийг яриад яах вэ, бид цаашдаа хамтарч ажиллах л хэрэгтэй байна. Нөхцөл байдал ийм байгаа тохиолдолд хууль батлагдах хүртэл ч юм уу тодорхой хугацаагаар хамтарч ажиллаж байхаас өөр арга байхгүй.

Ж.Гомбожав: Ерөнхийлөгчийн шийдвэрээр лиценз олгохыг зогсоосон. Мөнхсайхан 2013 оны 12 дугаар сарын хурал дээр мэдээлэл өгөхдөө 1298 байна гэсэн. Та 1300 байна гэж байна. Ямар компаниуд тусгай зөвшөөрөл нэмж авсан бэ?

Н.Бямбадагва: Одоогийн байдлаар энэ тоо 1300-гаас давсан байгаа. Хайгуулын тусгай зөвшөөрөлтэй компани ашиглалт руу орсон байдаг. Үүнийг хориогүй.

Х.Лхамаа: Хайгуулын зөвшөөрөл тусгай зөвшөөрөл рүү шилжиж болдог.

Ж.Гомбожав: Ураны зөвшөөрлийн талаар танайх мэдэхгүй юу. Цөмийн энергийн газраас нэмж тусгай зөвшөөрөл өгсөн байна гэдэг яриа байна.

Н.Бямбадагва: Манайх мэдэхгүй.

Г.Чагнаадорж: Өнөөдрийн байдлаар тусгай зөвшөөрөл эзэмшигчийн тоо хэд байна вэ?

н.Бямбадагва: Яг өнөөдрийн байдлаар бид тоо авсангүй. 2013 оны 12 дугаар сарын 31-ны байдлаар гаргасан тоо нь ашиглалт 1300, хайгуул 1729 бөгөөд нийт 3029 лицензийг 1660 компани эзэмшиж байна. Эдгээр 1660 компани тайлан гаргаж өгөх ёстой.

Г.Чагнаадорж: Би саяхан танай газраас тоо авсан юм. Хайгуулаас ашиглалт руу шилжиж болох юм байна. Ашиглалтын тоо нь нэмэгдсэн байх юм, энэ юу гэсэн үг вэ?

н.Бямбадагва: Ашиглалт зөвшөөрөл нь бас хуваагдаж болно. Тийм учраас энэ тоо янз бүр байж болох талтай.

Н.Алгаа: Одоо асуулт байхгүй бол дараагийн мэдээлэлээ сонсоё.

Д.Энхтуяа: ТЕГ-т Эрдэс баялагийн хэлтэс гэж ажиллаж байгаа. Бид Сангийн яамны удирдлаган доор төрийн байгууллагуудын тайланг хүлээн авч нэгтгэж байна. Тайлангаа ирүүлэх ёстай бүх яам, агентлагууд тайлангаа ирүүлсэн боловч буруу зөрүү гарсан тайланг эргэж тодруулах зэрэг ажлууд хийгдэж байна. АМГ, Цөмийн энэгийн газар, Газрын тосны газраас ирүүлсэн нийт 1732 аж ахуйн нэгж, 9 дүүрэг, яам агентлагуудын тайланг хүлээн авч байна. Бүх газрууд руу албан бичиг хүргүүлсэн. Тайлангийн маягтын сайн дурын хэсгийг бөглөх шаардлагагүй учраас энэ хэсэг нь тайлан дээр байх шаардлагагүй юм. Хүмүүс будлиад буруу зөрүү тоо тавих, үүнийг гаргахын тулд компаниудаас тайлан нэхэх зэрэг асуудал гараад байна. Угаасаа сайн дурын мэдээлэл нэгтгэлд ордоггүй. /Мэдээллийг хавсаргав/

Н.Алгаа: Бид анх маягтаа батлахдаа муу ажилласан байна.

Э.Сумъяа: Бид батласан маягтан дээрээ Сангийн яамны гаргах юман дээр ТББ-ын хандив гэж илүү зүйл оруулсан байна гэнэ.

Н.Алгаа: Үүнийг ажлын хэсэг дээр ярьж байгаад маягтаа янзлах асуудал байна. Ингээд дараагийн асуудалдаа орьё.

ШИЙДВЭРЛЭСЭН нь: 1. Тайлангийн явцыг ажлын хэсэг сонсож танилцлаа. Тайлалгын явцын тухай мэдээллийг хэвлэл мэдээлэлд нийтлүүлэхийг ажлын албанд даалгав.

III. ХЭЛЭЛЦСЭН нь: Монгол Улсын ОУИТБС-ын 2014 оны Ажлын төлөвлөгөөнд оруулах нэмэлт ажлын төлөвлөгөөний танилцуулга

Ш.Цолмон: 2014 оны хэлэлцүүлэг, зөвлөгөөний зөвлөмжийг хэрэгжүүлэх ажлын төлөвлөгөө юм. Үүнд нийт 19 ажлыг хийхээр төлөвлөөд санал авсан. Үүнээс 4 асуудал дээр санал нийлээгүй байгаа. Тухайлбал, 4,5,12,15 дугаар ажлууд дээр санал авч шийдэх хэрэгтэй байна. ТАН эвсэл гэж андуу тавьсан тул хүлцэл өчье. Үүнийг засаж иргэний нийгмийн байгууллага болгож засах болно. Ингээд та бүхэн саналаа эхлээд өгчих, дараа нь бид зардлыг нь тооцож гаргана. /Төлөвлөгөөг хавсаргав/

Н.Алгаа: Энэ асуудал дээр асуулт байхгүй байх, шууд саналаа хэлээд явчих.

Б.Батболд: Бид олон улсын стандарттаа мэднэ. Гэтэл төлөвлөгөөний 9 дүгээр асуудал юу гэсэн үг вэ? Дахиад орон нутагт зориулсан шинэ стандарт боловсруулна гэсэн үг үү?

Ш.Цолмон: Энэ жишиг маягаар байвал зүгээр юм уу гэсэн юм. Тухайлбал манай орон нутаг чинь өөр өөр байдаг.

Б.Батболд: Орон нутгийн онцлогт тохирсон стандарт гэсэн үг юм уу. Хэрвээ тийм гэвэл яаж боловсруулах, арга зүй гээд олон асуудал бий. Хэрвээ тэгэхгүй бол стандартыг орон нутагт хэрэгжүүлэхэд хөрсөн дээр буулгахын тулд стандарт хэлбэрээр нь биш, ажлын төлөвлөгөөг дэд зөвлөлийн ажилд яаж уялдуулах гэдэг тал дээр зөвлөмж маягаар хийхгүй бол болохгүй байна. Яг энэ хэвээрээ байвал ямар ч зохимжгүй байна.

Н.Алгаа: Тийм байна.

Ш.Цолмон: Хамаагүй ээ, найруулга энэ тэрийг засаж болно.

С.Бүрэнтогтох: Суманд дэд зөвлөл байгуулах зайлшгүй шаардлага байна. Тухайлбал, Өвөрхангай Бүрэнтогтох, Төв аймгийн Заамар гэх мэт сумын засаг захиргаатайгаа ажилладаггүй компаниуд байна. Тэгэхээр энд оруулах нэрийг оруулж болох уу. Одоо шийдэх юмуу?

Ш.Цолмон: Заавал одоо шийдэхгүй. Гэхдээ санал байвал өгч байж болно.

С.Бүрэнтогтох: Сумдын нэrsийн санал оруулмаар байна.

Н.Алгаа: За ойлгомжтой Заамар гэж санал өгч байгаа юм байна.

Ж.Гомбожав: Ер нь яагаад сумдын тоог багасгаад байгаа юм. Уг нь сум бүрт шаардлагатай байна гэж ярилцаж байсан чинь одоо 10-хан болгоод байна вэ? Хэрвээ уул уурхайг ил тод байлгая гэвэл тоог хязгаарлаад байх шаардлагагүй гэж үзэж байна. Хэрвээ төвөөсөө санхүүжилт өгөх гэж байгаа бол өөр хэрэг. Харин орон нутаг өөрсдийн төсвөөсөө санхүүжүүлээд явах тохиолдолд хэд ч байсан болох юм. Ер нь ажлын хэсэг маань эргэж буцаад байх шаардлагагүй. Өмнө нь бид ажлын хэсгийн хурал дээр ч, орон нутгийн сургалтын үеэр ч сум бүрт дэд зөвлөл байгуулья, ялангуяа уул уурхайтай суманд зайлшгүй байх нь зүйтэй гэж ярилцаж, тохирчиоод одоо болохоор өөр юм яриад байна. Ер нь бол уул уурхайгүй сум гэж байхгүй. Дор хаяад элс, хайрга ашиглаж л байгаа.

Х.Лхамаа: Сум бүр дээр дэд зөвлөл байгуулчихаар төсөв хөрөнгө нь яах вэ? Төсвөөс гаргаж өгч чадах юм уу?

Э.Сумъяа: чадахгүй

Ж.Гомбожав: Бид дэд зөвлөлийн үлгэрчилсэн дүрэм батласан биз дээ. Түүнд дэд зөвлөлийн санхүүжилтийг орон нутгийн төсөвт суулгаж өгнө гэж оруулсан байгаа.

Н.Алгаа: Тэгвэл уул уурхайн төсөл хэрэгжиж байгаа сум болгонд байгуулна гээд бичиж болно эсвэл 300 суманд гээд тавьчих. Гэхдээ бид хийж чадахгүй бол

төлөвлөгөө чинь биелэхгүй л гэсэн үг болно. Одоо асуудал дууссан тул шийдвэрийн төслөө ярилцая.

Б.Алтанбагана: Ер нь сум болгонд дэд зөвлөл байгуулахаар тэднийг ажиллуулахад их хүч хэрэгтэй. Одоо ажлын албанад тийм боломж байхгүй, тэдэнд хүрч ажиллаж чадахгүй юм чинь заавал сум болгонд байгуулах алба байна уу? Цаасанд дээр дэмий олон тоо тавьж байснаас доод тал нь тэд гээд үр дүнтэй арван юм хийнэ гэсэн нь зүгээр байх.

Н.Алгаа: Энэ ажил чинь санхүүжилт нь шийдэгдэхгүй бол хэрэгжихгүй юм биш үү.

Ж.Гомбожав: Бид дэд зөвлөлийн үлгэрчилсэн дүрэм батласан. Одоогоор 16 аймагт дэд зөвлөл байгуулсан байгаа. Гэтэл одоо тэрнээсээ цөөхөн дэд зөвлөл байгуулна гэж яриад байх юм. Тэгэхээр түрүүчийн шийдвэр дээрээ туйлбартай байхыг хүсэж байна.

Э.Сумъяа: Түрүүчийн Үндэсний зөвлөлийн 11 дүгээр хуралдааны шийдвэр дээр үлгэрчилсэн дүрмийг албан ёсны дүрэм болгож батлан мөрдүүлэх гэж заасан байна.

Б.Батболд: Энэ 103 суманд байгуулна гэсэн тоог ТАН эвсэл гаргасан. Тэгэхээр төлөвлөгөөндөө “тухайн жилийн төсөв санхүүжилтэнд зохицуулан дэд зөвлөлийг байгуулна” гээд оруувал яасан юм бэ.

Э.Сумъяа: Дэд зөвлөл байгуулахад төсөв мөнгөнөөс гадна хүнээ сургах сургалт хэрэгтэй байна. аймгуудад сургалт явуулаад, хүнээ сургаад байхад дэд зөвлөл байгуулж чадахгүй л байгаа.

Н.Алгаа: Мөн байгуулсан дэд зөвлөл нь сайн ажиллахгүй байна.

Г. Чагнаадорж: Аймагт дэд зөвлөл байхад суманд дэд зөвлөл байгуулна гэдэг чинь ажил супрахын шинж, аймгуудын дэд зөвлөл ажиллаж чадахгүй байгаа. Автоматаар аймгийн Засаг даргын орлогчийг томилсон, олон юм байгаад байвал ажил сулраад л байна.

Н.Алгаа: Бид нар тоог биш, үр дүнг хөөцөлдөх ёстой. Тэгэхээр одоо 16 аймагт байгуулсан дэд зөвлөлийн үр дүн гараагүй байхад бид зөвхөн тооны хойноос хөөцөлдмөөргүй байна. Туршилт гэдэг нь тэнд сайн ажиллаж байвал цааш нь байгуулж ажиллагаар байна. Түүнээс зөвхөн байгуулахын тулд байгуулж болохгүй байна.

Э.Сумъяа: Тэд хамтраад ажиллаад эхэлчихвэл үр дүн нь гарч байна гэсэн үг.

Н.Алгаа: Жишээ нь Заамар суманд дэд зөвлөл байгуулаад, тэр нь ажиллаад эхлэвэл сайн байна. Байгууллагын бүтцэд зориулж дүрэм батладаг. Үүнийг хийхэд ямар ч зардал мөнгө гарахгүй учраас хамгийн амархан. Харин түүнийг мөрдөж хэрэгжүүлэх нь хэцүү. Тэгэхээр үүнийг тоогүй л туршилтын гээд бичье. Сум бүрт гэдгийг нь хасаад оруулья.

Б.Батболд: Энэ төлөвлөгөөн дээр чинь тоо тавиагүй ажлууд зөндөө байна. Тэгэхээр тоо заавал заахгүй байж болно.

Б.Алтанбагана: Уг нь тоо заавал үр дүнг нь дүгнэхэд хэрэгтэй.

Н.Алгаа: Тэгэхээр 10, 103 гэхгүйгээр “туршилтын зарим сумдад байгуулах, тэрний тэргүүн туршлагыг нэвтрүүлэх...” гээд оруулья.

С.Бүрэнтогтох: Хэрвээ дэд зөвлөл байгуулаад ажиллалаа гэж үзвэл ЗГХЭГ-ийн шугамаар орон нутгийн засаг захиргаанд чиглэл, даалгавар өгөх үү?

Э.Сумъяа: Үүнийг яг амлаж чадахгүй.

Н.Алгаа: Дор хаяж нэг эсвэл хоёр байгууллагдсан байна гэж оруулья.

С.Бүрэнтогтох: Бид нар алтны холбоо гэж нэрээ оруулмаар байна.

Б.Батболд: Заавал энэ тэр гэж нэрээ оруулснаас Иргэний нийгэм гэж тавиад бид ажлаа хуваагаад авах ч юмуу, Уул уурхайн ассоциац гэвэл нүүрсний эсвэл алтны холбоо хийдэг ч юм уу тэгмээр байна.

Н.Алгаа: За ингээд энэ асуудлаа дуусгая. Гишүүдийн саналыг тусган найруулж оруулья.

Б.Отгонсайхан: Төлөвлөгөөний 14 дээр зөвхөн засгийн газрын байгууллагыг биш бүх оролцогч талуудыг үнэлмээр байна.

Ш.Цолмон: Тэр болно. Энэ чинь шинэ санал байна.

Б.Батболд: Гурван талын оролцоо 7 жилийн хугацаанд хамтарч ажиллаж байна. Үүнийг хөндлөнгийн байгууллагаар үнэлүүлэх хэрэгтэй байгаа юм.

Э.Сумъяа: Түрүүчийн судалгаагаар эхний үнэлгээ гарчихсан шүү дээ. Та нар засгийн газар, компанийг үнэлж болно.

Н.Алгаа: Гишүүд саналаа бичгээр явуулаад, түүнийг тусгаж оруулахаар тохирлоо. Ингээд дараагийн асуудалдаа орьё.

ШИЙДВЭРЛЭСЭН нь: 1. Ажлын хэсгийн гишүүдийн санал дүгнэлтийг тусган шинэчлэн найруулахаар тогтов.

IV. ХЭЛЭЛЦСЭН нь: Монгол Улсын ОУИТБС-ын шинэ стандартын орчуулгын танилцуулга

Б.Батболд: Надад асуулт байна. Бид стандартыг орчуулаад, түүнийгээ хэрэглээд, суртчилаад яваад байгаа мөртлөө өнөөдөр яагаад дахиад орчуулгын талаар сонсох хэрэгтэй болов?

Б.Дэлгэрмаа: Уг нь тийм, гэвч зарим нэг үг хэллэг дээр орчуулгын маргаан гараад, зарим хүмүүс энэ бол албан ёсны орчуулга биш байна баталгаажуулах хэрэгтэй гэсэн саналыг ТАН эвслийн зарим гишүүд гаргасан учраас үүнийг дахин орчуулгын товчоогоор оруулж, баталгаажуулсан. Тэгээд үүнийгээ гишүүдээр батлуулж албан ёсны болгох хэрэгтэй байгаа юм. Тухайлбал, “Beneficial ownership” гэдэг үгийг бидний орчуулгад “нөлөө бүхий хувьцаа эзэмшигч” гэж орчуулагдсан байсан. Манай хуулийн хэсэг дээр ажиллаж байсан

хүмүүс уг орчуулгаар хуулийн төсөлд оруулсан байгаа. Харин энэ үгийн тайлбарыг судалж үзэхэд энэ нь “хувь хүртэгч” гэсэн утгатай бөгөөд Монгол улсад мөрдөгдөж буй Үнэт цаасны хуулийн 4.1.26-д “бенефициар өмчлөгч” гэдэг үгээр нэршсэн байгаа юм. Тэгэхээр үүнийг санал солилцож тохиролцох хэрэгтэй байгаа юм. /Тайлбаруудыг хавсаргав/

Н.Алгаа: Хуулин дээр “бенефициар өмчлөгч” гэж байгаа л бол бид хуулийн нэр томъёогоор л авна. Тогтсон үг хэллэгийг л бид хэрэглэх ёстай.

Б.Дэлгэрмаа: Тиймээс бид англи үгийг өөрчлөхгүйгээр “бенефициар өмчлөгч” гэдэг үгээр нь байвал зөв байх гэсэн саналтай байна.

Б.Батболд: Тэгвэл энэ чинь негөө 5 хувь гэдэг агуулга нь алдагдах биш үү. Хэрвээ үүнд 10, 20 хувиас дээш хувьцаа эзэмшигч хамрагдахаар байвал яах вэ?

Б.Дэлгэрмаа: Үүнийг хэлж мэдэхгүй. Түүнийгээ хэдэн байх талаар өөрсдөө тохиролцох хэрэгтэй юм байна лээ.

Х.Лхамаа: Энэ чинь үр шим хүртэгч бүгд л хамрагдана гэсэн үг.

Н.Алгаа: Бид ямар ч байсан хуулинд оруулсан нэр томъёогоор л явах ёстай. Хэрвээ бид үүнийг монголчилвол энэ үгийн цаад утга санаа алдагдах болно. Үнэт цаасны хуулинд байгаа орчуулга шууд утга нь адилхан байгаа бол түүнийг л хэрэглэх ёстай.

Б.Батболд: Хуулийн хэсэг дээр ажиллаж байсан хуульчид өөрсдөө ингэж оруулсан. Ер нь бол компаниуд хамгийн эхэлж 5 хувь гэдэг саналыг гаргасан шүү.

Н.Алгаа: Яах вэ, тухайн үед буруу орчуулсан учраас буруу яваад ирсэн байна. Зөв орчуулсан байсан бол өөрөөр л явж байх ёстай.

Э.Сумъяа: Энэ чинь том хувьцаа эзэмшигч гэдгийг нь авч хаяад, жижиг чинь байхгүй болчиж байна. Өөрөөр хэлбэл 5 хувьцаа эзэмшсэн байсан ч үр шимийг хүртэгч, 5000 хувьцаа эзэмшиж байсан ч үр шимийг хүртэгч болох юм. Ганцхан хувь хэмжээ нь өөр байна. Харин “нөлөө бүхий” гэдэг чинь зөвхөн шийдвэр гаргахад нөлөөлөх хувьцаа эзэмшигч юм.

Л.Долгормаа: Тухайн үед бид ярилцаад нөлөө бүхий гэж заавал байх хэрэгтэй гэж оруулсан. Тухайлбал манай уул уурхайн компаниудын жинхэнэ эзэд нь их хурлын гишүүд байдаг.

Н.Алгаа: Хуулийн нэр томъёог бид өөрчлөх боломж байхгүй. Хэрвээ тэгвэл буруу хэрэгжүүлсэн болж таарна. Ер нь үр шимийг хүртэгч гэдэг чинь эзэн бас орно шүү.

Л.Долгормаа: Бид тэгээд ярилцаж байгаад л логик утгаар нь авсан.

Н.Алгаа: Одоо тэгээд засах хэрэгтэй.

Б.Дэлгэрмаа: Харин тиймээ, одоо тэрүүгээрээ явахаар бас буруу байна гээд байгаа. Тэгээд одоо аль нэрээр нь явах вэ?

Н.Алгаа: Хуулийн нэрээр л явах нь зөв.

Б.Батболд: Бид стандартаа хэрэгжүүлээд явж байгаа. Гэтэл Алгаа гуай олон улсад ингэсэн байна, хэрэгжүүлээгүй байна гээд байх юм. Бид нар зарим юмыг орон нутгийн хөрсөн дээр буулгаж болно гэсэн байгаа.

Н.Алгаа:Харин тэрнийгээ бид шийднэ.

Б.Батболд: “Хууль тогтоомжид харгалзуулан” гэсэн байгаа биз дээ. Тэгэхээр бид нар өөрсдөө шийдэх ёстой. 5 хувиараа байж болно.

Н.Алгаа: Үгүй, буруу ойлгоод байна. Наадах чинь “бенефициар өмчлөгч” гэдгийг 3 тал нь өөрсдөө тохироод түүгээрээ яв, үгүй бол орхи гэсэн үг. Тийм учраас маргаан гаралт байгаа нь, бид утгыг нь өөрчилснөөс болоод байгаа юм.

Х.Лхамаа: Бенефициар өмчлөгч гэдэг чинь илүү өргөн ойлголт шүү дээ. Зөвхөн 5 хувь ч биш.

Н.Алгаа: Бид стандартыг өргөн, нарийн гэж ярих нь зохимжгүй. Хуулийн нэр томъёогоор явах нь зөв.

Б.Дэлгэрмаа: Үүнийг одоохондоо аль нэрээр авахаа тогтоод, дараа нь ажлын хэсэг “бенефициар өмчлөгч” гэж ямар хүн байх вэ гэдгээ ярилцвал ясан юм бэ? Би яг орчуулгаа л асуугаад байгаа юм.

Н.Алгаа: Үнэт цаасны тухай хууль дээр “бенефициар өмчлөгч” гэж байгаа бол тэрүүгээр л явна. Орчуулагч хуулийн нэр томъёог тэр бүр мэдэхгүй. Тэрнийг буруутгаж болохгүй. Одоо маргаж цаг аваад яах вэ, дараагийн асуудалдаа орьё.

ШИЙДВЭРЛЭСЭН нь: 1. Үнэт цаасны тухай хуулийн 4.1.26-д “бенефициар өмчлөгч” гэж зааснаар тогтов.

V. ХЭЛЭЛЦСЭН нь: Бусад асуудал

Ш.Цолмон:Бид жил бүр улсын төсвийн санхүүжилтээс аудитын зөвлөх үйлчилгээний хөлснөөс тодорхой хэмжээний мөнгө хэмнэдэг. Тэгээд үүний урамшуулал болгож Сангийн яамнаас манай дансанд 1,3 сая төгрөгний урамшуулал олгосон байна. Үүнийг оролцогч талууд хамтраад захиран зарцуулах эрхтэй. Бид дарга нар, Сангийн яамны холбогдох ажилтнуудаас чиглэл авсны дагуу захиран зарцуулалтын талаар Ажлын хэсгийн хурлын шийдвэр гаргах ёстой юм. Урамшуулалын мөнгийг байгууллага гэдэг утгаар нь төрийн байгууллагуудад 400,000 төгрөг, Иргэний нийгмийн байгууллагуудад 400,000 төгрөг, уул уурхайн компаниудад 400,000 төгрөг, ажлын албанд 100,000 төгрөг олгох нь зүйтэй байх гээд санал оруулж байна. Саналаа өгнө үү.

Н.Алгаа: Татгалзсан санал алга байна. Тэгэхээр одоо шууд шийдчихье.

Б.Батболд: Ажлын хэсэг хуралдаад асуудал шийдэхээр ИНБ-ийнхан буюу бид л үлддэг, төрийн байгууллагынхан яваад өгдөг. Тэгээд хуваах болохоор яг тэнцүү хуваах ямар учиртай юм бэ? Жаахан наанатай цаанатай баймаар юм. Ядаж 500,000 төгрөг болгомоор байна.

Х.Лхамаа: Болно оо, оролцоо үр дүнгээрээ байж болно.

Н.Алгаа: Ассоциаци энэ урамшуулалыг авахаас татгалзлаа. Хоёр зууг нь ажлын албанд, хоёр зууг нь ИНБ-д өгье.

Б.Батболд: Энэ чинь сайхан санал байна. Засгийн 100,000 төгрөг хасагдсан шүү.

Н.Алгаа: Засгийн урамшуулал 300,000 төгрөг болсон. Засгийн байгууллагууд Сумъяа гуайгаар ахлуулж байгаа юм чинь та хэд хоорондоо л ярих нь...

Д.Энхтуяа: Бид байнга оролцоод хийх юмаа хийгээд л явж байгаа.

Б.Дэлгэрмаа: ТЕГ, Уул уурхайн яам, Сангийн яам, Ашигт малтмалын газрууд идэвхтэй сайн ажиллаж байгаа болохоор олгох саналтай байгаа.

Х.Лхамаа: Уул уурхайн яам бараг ирдэггүй.

Б.Дэлгэрмаа: Уул уурхайн яам хуулийн төсөл дээр сайн ажилласан.

Н.Алгаа: Миний харж байгаагаар Ашигт малтмалын газар, ТЕГ, Сангийн яамны хүмүүс байнга идэвхтэй сайн оролцож байна. Тэднийг үгүйсгэж болохгүй. Иргэний нийгмийн байгууллагуудад 700,000 төгрөг, төрийн байгууллагуудад 300,000 төгрөг, ажлын албанд 316,300 төгрөгийг тус тус хуваарилахаар боллоо.

Ш.Цолмон: Адам Смитийн санхүүжилтээр ажлын хэсгээс 6 хүн гадаад улс руу явж туршлага судлах ёстой. Тэдний санал болгосноор энэ оны 5 дугаар сард Гана улс руу явуулах бөгөөд талууд тус бүрээс хоёр хүн байхаар төлөвлөж байгаа. Мөн орчуулагч байхгүй учраас явах хүмүүст хэлний шаардлага тавигдаж байгаа. Компаниудаас хамтраад явж болох юм.

Э.Сумъяа: Засгаас татвар, ашигт малтмал хоёрыг явуулчихмаар байна.

Ш.Цолмон: Уул уурхайн яам явна гээд байгаа.

Х.Лхамаа: Уул уурхайн яам дандаа л явдаг шүү дээ.

Э.Сумъяа: Татвар, ашигт малтмалын газрын хүмүүсийг явуулсан нь дээр. Тайлан гаргахад тэд нар л нухдаг шүү дээ.

Г.Чагнаадорж: Цаанаасаа дөрвөн хүн гэсэн юм бол яагаад хасаад байгаа юм бэ? Бид дөрвөн хүнээ оруулаад, тэр дундаа хэл мэддэг хүн явуулах саналтай байна.

Ш.Цолмон: Цаанаасаа биш л дээ. Баярсайхан ИНБ-аас дөрвөн хүн явуулах санал гаргасан юм. Адам Смит зургаан хүний зардлыг л даана гэсэн.

Н.Алгаа: Тэгш оролцоогоороо бол адил тоотой байх хэрэгтэй. Гэхдээ манай хувийн сектор заавал ийм тийм гэхгүй, гэхдээ тэгш л байх ёстой.

Э.Сумъяа: Та нар тэнд очоод ажлын хэсэг нь ямар байна гэх мэт олон юмыг сайн мэдэж, судлах хэрэгтэй.

Б.Батболд: Тэгш оролцоог дэмжинэ, тэр зөв.

Н.Алгаа: За үүгээр хурлаа өндөрлөе. Хуралдаа идэвхтэй оролцсонд баярлалаа.

ШИЙДВЭРЛЭСЭН нь: 1. ОҮИТБС-ыг хэрэгжүүлэхэд идэвхи санаачилгатай ажиллаж буй төр, засгийн байгууллагад гурван зуун мянган төгрөг, иргэний нийгмийн байгууллагуудад долоон зуун мянган төгрөг, ажлын албанд гурван зуун арван зургаан мянга гурван зуун төгрөгийг урамшуулал болгон тус тус олгосугай.

2. Урамшуулалыг ажлын албаны нэмэлт санхүүжилтийн данснаас зарцуулсугай.
3. Ажлын албанаас Ажлын хэсгийн гишүүдэд судалгааны аялалын талаар бичиг явуулна.

Хуралд 17,30 цагт өндөрлөв.


Хурлын тэмдэглэлтэй танилцсан:

Уул уурхайн үндэсний ассоциацийн
гүйцэтгэх захирал



Н.Алгаа

Ажлын хэсгийн нарийн бичгийн дарга,
ажлын албаны зохицуулагч



Ш.Цолмон

Хурлын тэмдэглэл хөтөлсөн:

Ажлын албаны санхүүгийн
ажилтан



А.Отгонтунгалаг